

四庫全書

子部

# 欽定四庫全書

子部

古今事文類聚續集卷九

詳校官中書臣孫衡

侍讀臣孫球覆勘

總校官編修臣王燕緒

校對官編修臣盧遂

謄錄監生臣施華

欽定四庫全書

古今事文類聚續集卷九

居處部

堂宇

羣書要語堂謂堂堂高顯貌釋名堂上接武堂下布武曲禮

堂上不趨同攝齊升堂鄉黨堂高數仞榱題數尺我得志

弗為也盡心千金之子不垂堂表滿堂飲酒一夫向隅

滿堂為之不樂

漢書

或升之堂或入之室

潘岳閒居賦

詩句中堂高且新

韓

野外堂依竹

杜

重上君子堂

杜

開

襟野堂豁

杜

風露氣入秋堂涼

韓

古今事實

堂高三尺

堯舜堂高三尺土階三等

遷史自序

不下堂而治

舜彈五弦之琴不下堂而天下治

吳步騭疏

綠野堂

見第宅門

堂植三槐

銘見陰德門

太祖與符彥卿有舊俾知大名府有告其謀叛者以王  
晉公祐為代且委密訪其事戒曰得實吾當以趙普所  
居官命汝面授旨徑使上道祐到察知其妄數月無所  
聞驛召面問因力為辯曰臣請以百口保之太祖不樂  
徙祐知襄州彥卿竟亦無他祐後創居第於曹門外手  
植三槐于庭曰吾雖不為趙普後世子孫必有登三公

者已而魏公果為太保

石林燕語

寫記非生客

予由作棲賢堂記讀之便如在堂中見水石陰森草木  
膠輶也僕當為書之刻石堂上且欲與廬山結緣他日

入山不為生客也

志林

古今文集

雜著

有美堂記

歐陽永叔

嘉祐二年龍圖閣直學士尚書吏部郎中梅公出守於杭於其行也天子寵之以詩於是始作有美之堂蓋取賜詩之首章而名之以為杭人之榮然公之甚愛斯堂也雖去而不忘今年自金陵遣人走京師命予誌之其請至六七而不倦予乃為之言曰夫舉天下之至美與其樂有不得而兼焉者多矣故窮山水登臨之美者必之乎寬閒之野寂寞之鄉而後得焉覽人物之盛麗誇都邑之雄富者必據乎四達之衝舟車之會而後足焉

蓋彼放心於物外而此娛意於繁華二者各有適焉然其為樂不得而兼也今夫所謂羅浮天台衡岳廬阜洞庭之廣三峽之險號為東南奇偉秀絕者乃皆在乎下州小邑僻陋之邦此幽潛之士窮愁放逐之臣之所樂也若乃四方之所聚百貨之所交物盛人衆為一都會而又能兼有山水之美以資富貴之娛者惟金陵錢塘然二邦皆僭竊於亂世及聖宋受命海內為一金陵以後服見誅今其江山雖在而頽垣廢址荒烟野草過而



覽者莫不為之躊躇而悽愴獨錢塘自五代時知尊中國效臣順及其亡也頓首請命不煩干戈今其民幸富完安樂又其俗習工巧邑屋華麗蓋十餘萬家以湖山左右映帶而閩商海賈風帆浪舶出入於江濤浩渺煙雲杳靄之間可謂盛矣而臨是邦者必皆朝廷公卿大臣若天子之侍從又有四方遊士為之賓客故喜占形勝治亭榭相與極遊覽之娛然其於所取有得於此者必有遺於彼獨所謂有美堂者山水登臨之美人物邑

居之繁一寓目而盡得之蓋錢塘兼有天下之美而斯堂者又盡得錢塘之美焉宜乎公之甚愛而難忘也梅公清慎好學君子也視其所好可以知其人焉四年八月丁亥廬陵歐陽脩記

梅公作此堂最得登臨佳處歐公為之作記人謂公未嘗至杭而所記如目覽坐堂上者使之為記未必能如是之詳也

見文集

有竹堂記

晁無咎

濟南李文叔為太學正得屋於經衢之西輸直於官而居之治其南軒地植竹砌傍而名其堂曰有竹榜諸棟間又為之記於壁率午歸自太學則坐堂中掃地置筆研呻吟策牘為文章日數十篇不休如繭抽緒如山蒸雲如泉出地流如春至草木發須臾盈卷軸門窓几案婢僕犬馬目前之物有一可指無不論說形容彊嘲而故評之以致其欣悅而於竹尤數數也顧其地狹而卑天雨榛蕨蜘蛛之織河柳兔葵之所交橫而蒙翳人不

知其竹也有過者文叔必顧堂下而語之讀壁間記仰棟而指其榜曰吾固詔客矣客輒然而笑曰今夫渭川之千畝淇園之叢林與南山之造天而蔽日者其大若杯若盂若桐梓之軀其膠繚嵌巖之上而臨百仞之淵不特出屋簷而摩牆堵也暮春者春雷隱隱萬竒奮角如犀兕作籜解而出碧一日百尺彌望不可以極於時刀斧之取材者度徑圍而得之大小齊一西轉已竿南引江漢浮渭而亂河困東蒔屬而下者為筒為竿為屋

椽榱萬千丈之竿徧國之藩籬是賴竅而比夫律呂以  
悲哀娛耳者音聲滿天下也視其旁之人室廬竹也用  
罷竹也樵而薪者竹也以貿米鹽而出之其鄰境者竹  
也夫此人豈知竹之愛脩然而喜諄諄然語人而以夸  
之曰吾居有竹也哉文叔亦蹶然而笑曰不然夫物安  
知其貴賤之所常在玉之美而藍田以抵鵲沈為美木  
而交趾以為槃食彘白鷗錦鷄山中以醢腊而貴人以  
百金致茗以為粥而番人以為佩夫物固有以多為賤

而以少為貴者今夫王城之廣大九塗四達三門十二陌坊之棊置上自王侯至於百姓庶民宮接而垣比車馬之所騰藉人氣之所蒸漬囂塵百里欲求尺寸之地以休逸而莫之致而貧者置園無所況於其他哉然則環堵不容丈而有竹如吾堂者不知能幾人也則余所以揭之於棟而名之書諸壁而記之脩然而喜諄諄然語客以夸之不亦可哉且竹之美昔人以比德松栢在冬夏青青君子之所獨也以夫少猶貴之使余得見夫

渭川淇園與南山之蒼蔚者而遊其間雖多固不可賤也夫多猶不可賤又況其少哉客曰唯雖然吾聞昔王子猷好竹嘗曰安可一日無此君聞吳中士大夫有佳竹欲觀之徑出坐輿造竹下諷嘯良久主人欲留而不可將出主人閉之因盡歡而返今文叔居有竹文叔姑亦洒掃儲具借不邀客客將造門坐堂上去曰竹固招我

醉白堂記

蘇子瞻

故魏國忠獻韓公作堂於私第之池上名之曰醉白取  
樂天池上之詩以為醉白堂之歌意若有羨於樂天而  
不及者天下之士聞而疑之以為公既已無愧於伊周  
矣而猶有羨於樂天何哉軾聞而笑曰公豈有羨於樂  
天而已乎且願為尋常無聞之人而不可得者天之生  
是人也將使任天下之重則寒者求衣饑者求食凡不  
獲者求得苟有以與之將不勝其求是以終身處乎患  
難之域而行乎利害之途豈其所欲哉夫忠獻公既已



相三帝安天下矣浩然將歸老於家而天下共挽而留之者莫釋也當是時其有羨於樂天無足恠者然以樂天之平生而求之於公較其所得之厚薄淺深孰有孰無則後世之論有不可欺者矣文致太平武定亂畧謀安宗廟而不自以為功急賢才輕爵祿而士不知其恩殺伐果敢而六軍安之四夷八蠻想聞其風采而天下以其身為安危此公之所有而樂天之所無也乞身於強健之時退身十有五年日與其朋友賦詩飲酒盡山

水園池之樂府有餘帛廩有餘財而家有聲妓之奉此樂天之所有而公之所無也忠言嘉謨效於當時而文采表於後世死生窮達不易其操而道德高於古人此公與樂天之所同也公既不以其所有自多亦不以其所無自少將推其同者而自託焉方其寓形於一醉也齊得失忘禍福混貴賤等賢愚同乎萬物而與造物者遊非獨自比於樂天而已古之君子其處已也厚其取名也廉是以實浮於名而世誦其美不厭以孔子之聖

而自比於老彭自同於丘明自以為不如顏淵後之君子實則不至而皆有侈心焉臧武仲自以為聖白圭自以為禹司馬長卿自以為相如揚雄自以為孟軻崔浩自以為子房然世終莫之許也由此觀之忠獻公之賢於人也遠矣昔公嘗告其子忠彥將求文於軾以為記而未果公薨既葬忠彥以告軾以為義不得辭也乃泣而書之

冰玉堂記

張文潛

熙寧中余為臨淮主簿始得拜劉公道原於汴上是時  
道原方修資治通鑑而執政有素高其才者欲用以為  
屬道原義不屈遂與絕復以親老求為南康酒官故書  
未成而去余既慕公之義而望其眉宇聽其議論其是  
非予奪之際凜然可畏而服也士大夫皆曰劉君之賢  
非獨其信道篤立心剛博學洽聞之所至是蓋得父之  
風烈公之父諱渙字凝之有詞學為小官數以事屈在  
勢者節高不能容於世年五十餘為潁上令即致仕歸

隱於廬山築室種蔬而食之無求於物人皆師尊焉於是既老矣公歸廬山無幾何得疾以元豐元年九月卒公諱恕道原蓋其字後十餘年而當元祐元年余受詔校資治通鑑於秘書省是時公同時脩史之人徃徃而在道公之事本末尤詳皆曰道原廉介剛直其仕必欲達其道不以一毫挫於人者也方其激於義而作雖足蹈坎井手攬虎兕視之若無見雖古烈士或愧焉平居自負經濟大畧而視其為吏則嚴簿書束胥吏撫鰥寡

繩豪猾纖悉曲當皆可為後法其學自書契以來以至  
於今國家治亂君臣世系廣至於郡國山川之名物詳  
至於歲月日時之後先問焉必知考焉必信有疑焉必  
決其言滔滔汨汨如道其里問族黨之事也其著書有  
疑年譜年畧譜通鑑外紀十國紀年惟十國紀年先成  
世傳之世以比遷固歆向公亦自以不愧而自范曄以  
降不論也當時司馬君實歐陽文忠號通史學貫穿古  
今亦自以不及而取正焉凝之晚善養性篤行老益壯

年八十一後道原數年卒累官至屯田員外郎其終也未嘗疾沐浴正冠而絕嗚呼亦異矣元符中余補官春陵道原之子義仲主簿於德安叙其大父與父之事示予且曰頃眉山蘇子由嘗道廬山拜我大父於床下出而歎曰凜乎非今世之士也其卒為詞以哭曰凝之為父與道原之為子潔廉不撓冰清而玉剛鄉人是其言名吾大父所居之堂曰冰玉君為我實記之余曰昔司馬談能推明孔子作春秋之意欲為史未成以授其子

遷而遷遂能網羅三代放逸舊聞馳騁上下數千歲成一家之書與六經並傳父子之於文學美矣而風節無聞焉疏廣受於宣帝有師傳恩而父子一旦棄去視捨富貴如棄去垢骨肉之際風節同矣而文學無傳焉孰如君家父子文學風節輝輝並著名立於父而顯於子千載之遠四海之廣而一家擅之嗟乎世固未嘗有也始余應舉時與道原之弟格遊愛其學博而論廣是盖得其兄之餘而義仲敏於學而健於文屹然好名而立



節者也余知冰玉堂之洒掃有繼矣其爵里世系與其  
行事之詳則既有誌之者矣故不復出因為詞以系之  
曰

我所思之人兮嗟可想而不可見意其人兮俯青雲而  
下睨矚九日而不眩超然不知其何之兮遺此空山之  
故居豈訪重華而陳誼兮父唱子和與仙聖乎為徒紆  
為雲霓兮注為江湖偉為哲人兮我言在書超駕言而  
從之兮指廬山乎休吾車耕山而食兮梁溪而漁儼頓

轡而不敢留兮恐其尚謂我污也

冰玉堂記

朱元晦

南康使君曾侯致虛既葺屯田劉公之墓明年乃訪得其故居遺地於郡治之東暇日屏騶馭披荊棘而往觀焉問其北隱然以高者則劉公所賦之東臺也顧其南窅然以下者則詩序所指之蓮池也蓋自兵亂以來蕪廢日久唯是僅存而其他則皆漫滅不可復識矣曾侯為之躊躇四顧喟然而歎曰凝之之為父道原之為子

其高懷勁節有如歐馬蘇黃諸公之所道是亦可謂一  
世之人豪矣想其平日之居此林塘館宇之邃詩書圖  
史之盛既有以自適其適而一時遊且宦於此邦者亦  
得以叩門避席而考德問業焉何其盛也顧今百年之  
外臺傾沼平鞠為灌莽而使樵兒牧子皆得以嘯歌躅  
躑於其上又何其可悲也雖然此吾事也不可以不勉  
乃出少府羨錢贖之民間垣而溝之以合於郡圃累石  
以崇其臺引流以深其池遂作冰玉之堂於臺之西北

而繪劉公父子之像於其上且聞陳忠肅公之嘗館于是也則又繪其像以侑焉既而所謂是是堂漫浪閣者亦以次舉而皆復其舊既成使人以圖及書來屬予記予惟異時承乏此邦亦嘗有意於斯而不克就今披圖考驗尚能憶其髣髴固喜曾侯之敏於事而能有成矣抑予又有感焉近歲以來人心不正保身者以同流合污為至行任事者以便私適已為長策其聞劉氏父子之風不唾而罵之者幾希矣欲其能如曾侯一以表賢

善俗為心而不奪於世豈可得哉於是既書其事而適有以陳令舉騎牛詩畫為寄者因并以遺曾侯請刻堂上以補一時故事之缺云

揚州重建平山堂記

洪景廬

揚為州最古南傳海北犍淮井而方之蓋萬里後世乖離鉞析殆且百郡獨廣陵得鼎其名故常稱巨鎮為刺史治所為總管府為大都督府為淮南節度使方唐盛時全蜀尚列其下至有揚一益二之語入本朝事權繼

衰而太守猶帶一道鈐轄安撫使品其域望他方莫與  
京也迷樓九曲珠簾十里二十四橋風月登臨氣槩政  
已突兀今古茲堂最後出前志謂江南諸峯植立簷戶  
肩摩領接若可拔取山川既佳而又歐陽公寔張之故  
聲壓宇宙如揭日月播紳之東西以不得到為永恨意  
層城閭風中天之臺抑末耳其重如此然百餘年間屢  
盛屢歇瓦老木腐因之以傾侈荐之以兵革而遺址離  
離無復一存荒烟白露蒼莽滅没使人意象萎然誦山

色有無之句付之三歎而已吳興周侯淙開藩之二年  
北邊輸平民俗安定思所以壯隆一邦作新窮簷乃致  
志於所謂平山堂者稽工伐材費省工倍四旬而落其  
成遺民憧憧後先策老抱幼目蕩覓怡不自意太平官  
府之見至或感以泣有客從北來為予言相與心嘉之  
而侯踵書來請記揚為州雖大然非昔比矣無有崇臺  
累榭之勝瓌觀佚覽之樂為官者視蔭即去無所寄適  
非真有嫪慕不輕得留也侯獨居之安居之安則其於

事也勇而立一堂之就似無諱以勞者曩侯為盱眙予  
廷勞使客出其間彌兩月留留益久得侯之用心拊摩  
饑荒中雖履屐間亦盡善今日典大府為方伯休其心  
於護邊垂障之餘以抗思埃風之外追昔人而與居豈  
不益可嘉則一堂之就宜有足夸者故為顯書之使淮  
人時節來游笙簫舞歌徜徉乎其上拂石而饒之以無  
忘賢侯之德侯方以功力奮從是為羽儀天朝可卜不  
疑



三槐堂記

見陰德門

律詩

西郊

杜甫

時出碧鷄坊西郊向草堂市橋官柳細江路野梅香傍  
架齊書帙看題檢藥囊無人競來往疎懶意何長

堂成

杜甫

背郭堂成蔭白茅緣江路熟俯青郊  
檉林礙日吟風葉籠竹和煙滴露梢  
暫止飛鳥將數子頻來語燕定新巢

旁人錯比揚雄宅懶惰無心作解嘲

園池

羣書要語園植果圃植木

說文

園圃毓草木

周禮

場人掌場

圃植果蓏

上同

無踰我園

將仲子

折柳樊圃狂夫瞿瞿

東方

余

既滋蘭之九畹兮又植蕙之百畝

楚詞

園日涉以成趣

陶詞

池沼池也

廣雅

池者陂也

說文

孫子有金池湯池之固後人

因此開地為池以養魚鼈

風俗通

鑿斯池也

孟子

詩句清夜遊西園飛蓋相追隨

曹植

開門朝掃徑輦水夜

澆花于鳥下花間井人彈竹裏琴溫園林窮勝事選清

晨向小園杜名園依綠水杜故園花自發杜池池塘生

春草謝靈運方池涵清源選方塘涵白水選柳塘春水漫

嚴維小水細通池杜數株碧柳蒼苔地一丈紅蕖綠水池

荆公

古今事實

射矍圃

孔子射於矍相之圃射義

居鄭圃

列子居鄭圃四十年人無識者

天瑞篇

抱甕灌園

子貢過漢陰見一丈人為圃畦鑿隧而入井抱甕而出  
灌用力甚多而見功寡子貢曰有械於此一日浸百畦  
夫子不欲乎丈人曰柰何曰鑿木為機後重前輕挈水  
若抽數如沃湯其名桔槔為圃者忿然作色而笑曰有  
機械者必有機事有機事者必有機心道之所不載也

吾非不知羞而不為也子貢慙然而慙曰始吾以夫子

天下一人耳不知復有斯人也

莊天  
地篇

且子獨不見夫桔

槔乎引之則俯捨之則仰彼人之所引非引人也故俯

仰不得罪於人

天運  
篇

### 拔園葵

公儀休相魯拔園葵不與人爭利

### 馬踐園葵

魯漆室之女曰昔有客繫馬園中馬逸踐葵使子終歲

不飽葵

註見憂世門

不窺園

董仲舒下帷發憤三年不窺園

灌園收利

向秀與呂安灌園於北山陽收其餘利以供酒食之費

園池假人

孝和元年詔有司京師離宮園池悉以假貧人

東觀漢記

車水入園

魏馬鈞巧宦絕世居京都有地可以為園而無水以灌  
乃作翻車令兒童轉之而灌水自覆更出更入巧百倍  
於常

### 華林園

簡文華林園顧謂左右曰會心處不必在遠翳然林木  
便自有濠濮間想覺鳥獸禽魚自來親人

世說

### 園主不禮

晉王獻之高邁不羈雖間居終日不怠容止風流為一

時之冠嘗經吳郡聞顧辟疆有名園先不相識乘平肩輿徑入時辟疆方會賓友獻之游歷既畢傍若無人辟疆勃然數之曰傲主人非禮也以貴驕士非道也失是二者不足齒之傖耳便驅出門獻之傲如也不以屑意

鉏園得金

管寧華歆園中鉏菜見地有片金管揮鉏與瓦石不異

華捉而擲之

世說

金谷園



石崇金谷詩序曰余以元康六年從太僕卿出為使持  
節監青徐軍事征虜將軍有別廬在河陽縣界金谷澗  
中或高或下有清泉茂林衆果竹栢藥草之屬莫不畢  
備又有水碓魚池土窟其為娛目歡心之物備矣

### 園丁賣菜

柳元景為尚書令南岸有數十畝菓園守園人賣菜得  
錢三萬送宅元景曰我立此園種菜以供家中啖耳乃  
復賣以取錢奪百姓之利耶以錢乞守園者

宋書

苑中立肆

齊東昏以閱武堂為芳樂苑窮奇極麗苑中立店肆潘妃為市令自為市吏錄事將鬪者就妃罰之百姓歌曰  
閱武堂種楊柳至尊屠肉潘妃酤酒

盜蔬不問

齊范元琰家貧以園蔬為業嘗見人盜其菰元琰遽走欲起其愧恥或有涉溝盜其笋者元琰伐木為橋以度之盜者大慙

平泉莊

贊皇公平泉莊周迴十里建堂榭百餘所今基址猶存  
天下奇花異草珍松怪石靡不畢致其間故德裕自製  
平泉草木記今悉蕪絕唯鴈翅檜珠子栢蓮房玉藻等  
蓋僅有存者怪石名品甚衆多為洛城有力者取去唯  
禮星石及獅子石今為陶學士徙置梨園別墅賈氏談錄世  
傳李德裕醒酒石以水沃之有林木自然之狀淮南志

不市張相園

唐嗣曹王臯為山南東道節度張東之有園圃在襄陽  
臯將市取之馬彛諫曰漢陽有中興功今遺業當百世  
共保柰何使其子孫鬻乎臯謝曰主吏失詞以為君羞  
微君安得聞此言

不受園丁錢

溫公營獨樂園園子呂直性愚公以直名之春時人遊  
園園子得茶湯錢十千閉園日與主人分之一日來納  
公公曰此自汝錢可持去再三欲留公怒遂持之顧曰

只端明不愛錢者後十許日公見園中新創一井亭問  
之乃前不受十千所創也

元城語錄

太液池

以下係池

武帝作建章宮其北治大池名曰大液池中有蓬萊方  
丈瀛洲壺梁象海中神山龜魚之屬

昆明池

武帝作昆明池習水戰西京雜記云武帝於池中置二  
石人相對以象牽牛織女又刻石為鯨魚每雷雨魚常

鳴吼鬚尾皆動

習家池

峴山南八百步西下道百步有習家魚池山簡永嘉三年鎮襄陽每日遊戲多在池上飲輒醉名之曰高陽池

襄陽記

西苑池

隋煬帝大業元年築西苑周二百里其內為池周十餘里為三神山儲水百餘尺臺觀宮殿羅列山上北有龍

鱗渠縈紆注池內緣渠作十六院門皆臨渠每院四品夫人主之宮樹秋冬已彫落則剪綵為華葉綴於枝條色渝則易以新者常如陽春沼內亦剪綵為荷菱菱茨車輿遊幸則即水而布之

### 放生池

唐肅宗詔天下臨池帶郭處置放生池始于洋州興道迄于昇州江寧凡八十一所顏真卿為之碑

### 浴妃池

楊貴妃生於蜀常誤落池中後人呼為浴妃池

外傳

古今文集

雜著

平泉山居戒子孫記

李德裕

經始平泉追先志也吾隨侍先太師忠公在外十四年  
上會稽探禹穴歷楚澤祭巫山遊沅湘望衡嶠忠公每  
維舟清眺意有所感必悽然遐想屬在伊川常賦詩曰  
龍門南嶽盡伊原草樹人煙目所存正是北州梨棗熟



夢魂秋日到郊園吾心感是詩有退居伊洛之志前守  
金陵于龍門得喬居士故居天寶末避地遠遊為荒榛  
首陽微岑尚有薇蕨山陽舊徑唯餘竹木吾乃廢荆棘  
驅狐狸如立班生之宅漸成應叟之地又得江南珍木  
奇石列于庭際平生素懷於此足矣吾常以為出處者  
貴得其道進退者貴不失時古來賢達多有遺恨至於  
玄祖潛身于柱史柳惠養德於士師漢代邴曼容官不  
過六百石終無辱殆不可及矣越蠡激文牛以肥遯留

侯託黃老以思世亦其次焉范曄感蔡澤一言超然高  
謝鄧禹見功臣多敗委遠名勢又其次也矧如吾者于  
葵無衛足之智處鴈有不鳴之患雖有泉石杳無歸期  
留此林居貽厥後代鬻平泉者非吾子孫也以平泉一  
樹一石與人者非佳子弟也吾百年之後為權勢所奪  
則以先人所命泣而告之此吾志也詩曰維桑與梓必  
恭敬止言其父所植也昔周公之思召伯愛其所憇之  
樹近代薛令君於禁省中見先祖所據之石必泣然流

涕汝曹可不慕之唯岸為谷谷為陵然後已焉可也

五代張全義唐莊宗時為太師尚書令兼四鎮節度有監軍嘗得李德裕平泉醒酒石德裕孫廷古託全義復求之監軍忿然曰自黃巢亂後洛陽園宅無復能守豈獨平泉一石哉全義常在賊巢中以為譏已大怒笞殺之

本傳

歐陽集古錄跋云余讀鬼谷子書見其馳說諸侯之國必視其為人材性賢愚剛柔緩急而因其好

惡喜懼憂樂而捫闔之陽開陰塞變化無窮故天下諸侯無不在其術中者惟不見其所好者不可得而說也以此知君子宜慎其所好蓋泊然無欲禍福不能動而利害不能誘此鬼谷之術不能為者賢聖之高致也其次簡其所欲不溺於所好斯可矣若德裕者處富貴招權利而好奇貪得之不已至或疲敝精神於草木斯其所以敗也其遺戒云壞一草一木者非吾子孫此又近乎愚矣

獨樂園記

司馬君實

孟子曰獨樂樂不如與人樂樂樂與少樂樂不如與衆樂  
樂此王公大人之樂非貧賤者所及也孔子曰飯蔬食  
飲水曲肱而枕之樂亦在其中矣顏子一簞食一瓢飲  
不改其樂此聖賢之樂非愚者所及也若夫鷦鷯巢林  
不過一枝偃鼠飲河不過滿腹各盡其分而安之此乃  
迂叟之所樂也迂叟始家洛五年為園其中為堂聚書  
五千卷命之曰讀書堂

云

云

迂叟平日多處堂中讀書

上師聖人下友羣賢窺仁義之原探禮樂之緒自未始  
有形之前暨四達無窮之外事物之理舉集目前可者  
學之未至夫可何求於人何待於外哉志倦體疲則投  
竿取魚執衽采藥決渠灌花操斧斫竹濯熱盥水臨高  
縱目逍遙徜徉惟意所適明月時至清風自來行無所  
牽止無所枕耳目肺腸卷為已有踴躍焉洋洋焉不知  
天壤之間復有何樂可以代此也因合而命之曰獨樂  
或咎迂叟曰吾聞君子所樂必予人共之今吾子獨取

於已不以及人其可乎迂叟謝曰叟愚何德比君子自樂恐不足安能及人况叟之所樂者薄陋鄙野皆世之所棄也雖推以與人人且不取豈得強之乎必也有人肯同此樂則再拜而獻之矣安敢專之哉

北村記

葉正則

戶部尚書吳興沈公園於城北奉勝門外而使告余曰北村畝餘三十中涵五池大半皆水也其為叢木茂花之蔭狹矣靈壽書院劣容卧起而移老堂巨屋也不過

三楹而止其為崇閎邃宇之居褊矣洲藏渚伏濠港限  
隔非舟不能通道相為市者皆魚蝦之友菱芡之朋而  
冠帶車馬之來絕矣併日却坐分夜獨宿艣回棹轉穿  
南北而透東西遺音歟乃常在庭際而絲竹鼓鐘之奏  
息矣蓋其陋若此也惟對湖臺高不逾丈具區前臨湖  
心遠峰明晦滅沒近而後溪鳳凰毗弁諸山往往湊泊  
於溪山亭之下殆或天與者雖然是亦樵夫野人之所  
同有也若夫城中甲觀大囿照耀映奪曾不敢仰視而



側立也吾聞古之善游者粗於天而不精於人今吾鹵  
莽而營之苟且而成之姑以寄吾身於一壑之內而游  
於天地之外非所謂粗耶故名其園曰自足而甲觀大  
圃照耀而映奪者非惟不敢望亦不敢羨焉余謂公冲  
約有清識既以天趣得真樂而又能挹損其言不自夸  
擅可謂賢矣余常評天下山水之美雖質文變態各異  
而吳興特為第一其山脈地絡融液而浸灌者莫非氣  
之至清渟止演漾澄瑩紺澈數百千里接以太湖蒲荷

蘋蓼盛衰榮落無不有意而來鷗去鳥風帆浪楫恣肆  
渺莽不知其所窮昔之功已就若范蠡身不用若張志  
和之流未嘗不遁逸嘯歌於其間蓋仙聖之宅非人世  
也余海濱之人山凡水俗常恨不得生長其地而尚友  
其賢豪沈公乃以築圃曲折名實大指使余記之豈非  
所願欲也哉

古詩

同羣公題張處士菜園

高適

耕地桑柘間地肥菜芋熟為問葵藿姿何如廟堂肉

在京思故園見鄉人問

王無功續

旅泊多年歲老去不知迴忽逢門前客道發故鄉來歛  
眉俱握手破涕共銜盃慙慙訪朋舊屈曲問童孩衰宗  
多弟姪若箇賞池臺舊園今在否新樹也應栽柳行疎  
密布茅齋寬窄裁經移何處竹別種幾株梅渠當無絕  
水石計總生苔院果誰先熟林花那後開羈心祇欲問  
為報不須猜行當驅下澤去剪故田菜

答王無功思故園見鄉人 朱元晦

我從銅川來見子上京客問我故鄉事慰子羈旅色子  
問我所知我對子應識朋遊摠強健童稚各長成華宗  
盛文史連牆富池亭獨子園最古舊林間新垌柳行隨  
隄勢茅齋看地形竹從去年移梅是今年榮渠水經夏  
響石苔終歲青院果早晚熟林花先後明語罷相歎息  
浩然起深情歸哉且五斗餉子東山行

司馬君實獨樂園

蘇子瞻

青山在屋上流水在屋下中有五畝園花竹秀而野花  
香襲杖屨竹色侵醺尊酒樂餘春棊局消長夏洛陽  
古多士風俗猶爾雅先生卧不出冠蓋傾洛社雖云與  
衆樂中有獨樂者才全德不形所貴知我寡先生獨何  
事四海望陶冶兒童誦君實走卒知司馬持此欲安歸  
造物不我捨名聲逐吾輩此病天所赅拊掌笑先生年  
來效喑啞

東坡作獨樂園詩只從頭四句都說盡便可以圖

畫

題李氏園

蘇子瞻

朝遊北城東回首見修竹下有朱門家破牆圍古屋舉  
鞭扣其戶幽響答空谷入門所見夥十步九移目異花  
兼四方野鳥喧百族其西引溪水活活轉墻曲東注入  
深林林深窻戶綠水光兼竹靜時有獨立鵠林中百尺  
松歲久蒼鱗蹙豈惟此地少意恐關中獨小橋過南浦  
夾道多喬木隱如城百雉挺若舟千斛陰陰日光淡黯

黯秋氣蓄盡東為方池野鴈雜家鶩紅梨驚合抱映鳥  
孤雲馥春光水溶漾雪陣風番撲其北臨長溪波聲卷  
平陸北山卧可見蒼翠間硤禿我時來周覽問此誰所  
築云昔李將軍負險乘衰叔抽錢筭閒口但未擁羹粥  
當時奪民田失業安敢哭誰家美園圃籍沒不容贖此  
亭破千家鬱鬱城之麓將軍竟何事蟣虱生刀韞何嘗  
載美酒來此駐車轂空使後世人聞名頭尚縮我今官  
正閒屢至因休沐人生營居止竟為何人卜何當辦一

身永與清景逐

題朱勛家園

劉屏山

晨輝麗丹極，翌翌倅帝居。向東堂上人，零落烟海隅。不才際時會，振跡皆刑餘。閨幃尚帝主，皂隸乘軒車。流威被東南，生殺在指呼。樓船載花石，里巷無袴襦。至今江左地，風雲亦嗟吁。叨榮已過量，受禍如償逋。荒涼戟門路，尚想冠蓋趨。客船維岸柳，呼人罾池魚。徘徊極幽討，曲折迷歸途。夜月扃綺戶，春風散羅裾。榮華能幾時，喪



亂實感予曹鄴子何譏此曹真人奴

芍藥宅

楊廷秀

風雨敗花為花作宅上棟下宇瓦之壁之  
皆以油簾

何以築花宅筆直松樹子何以蓋花宅雪白清江紙紙  
將碧油透松作畫棟峙鋪紙便成瓦瓦色水晶似金鴉  
暖未焰銀竹響無水汗容漬不泣晴態嬌非醉盡收香  
世界闕在閒天地風日幾曾來蜂蝶獨得至勸春入宅

莫歸休勸花住宅且小留昨日花開開一半今日花飛  
飛數片留花不住春竟歸不如折挿瓶中看

律詩

春園即事

王維

宿雨乘輕屐春寒著敝袍開畦分白水間柳發紅桃草  
際成基局林端舉桔槔還持鹿皮几日暮隱蓬蒿

題崔端公園林

李端

上士愛清輝開門向翠微抱琴看鶴去枕石待雲歸野

坐苔生席高眠竹掛衣舊山東望遠惆悵暮花飛

治圃

張文潛

儗舍亦為圃從人笑我痴自求佳草木仍挿小藩籬吾  
事正如此人生聊自怡霜松未及尺獨我見竒姿

南園

羅隱

搏擊路終迷南園且灌畦敢言逃俗態自是樂幽栖葉  
長春松澗科圓早薤齊雨沾虛檻冷雲壓遠山低竹好  
還成徑桃夭亦有蹊小窻奔野馬閒甕養醯雞水石心

逾切烟霄分已睽病憐王猛  
畚愚笑隗囂泥澤圃潮平  
岸江村柳覆隄到頭乘興是  
誰手好提攜

老圃堂

盧綸

邵平瓜地接吾廬  
穀雨乾時偶自鋤  
昨日春風欺不在  
就牀吹落讀殘書

南園偶題

薛能

天子優賢是有唐  
鑑湖恩賜賀知章  
他年我若成功去  
乞取南園作醉鄉

田園雜興

范至能

種園得果僅償勞不奈兒童鳥雀騷  
已插棘針樊笋徑更鋪魚網蓋櫻桃

又

蝴蝶雙雙入菜花日長無客到田家  
雞飛過籬犬吠竇知有行商來賣茶

三三徑

楊廷秀

東園新開九徑江梅海棠桃李橘杏紅梅

碧桃芙蓉九種花木各植一徑命曰三三

徑云

三徑初開是蔣卿再開三徑是淵明誠齋奄有三三徑  
一徑花開一徑行

郊墅

鄭谷

帝曲樊川雨半晴竹莊花院遍題名畫成煙景垂楊色  
滴破春愁壓酒聲滿野紅塵誰得路連天紫閣獨關情  
漢陂水色澄於鏡何必滄浪始濯纓

黃處士園林

劉威

偶向東湖更向東  
數聲雞犬翠微中  
遙知楊柳是門處  
似隔芙蓉無路通  
樵客出來山帶雨  
漁舟過去水生風  
物情多與閒相稱  
所恨求安計不同

洛下園池

邵堯夫

洛下園池不閉門  
洞天休用別尋春  
縱游只却輸閒客  
遍入何嘗問主人  
更小亭欄花自好  
儘荒臺榭景纔真  
虛名誤了無涯事  
未必虛名撏到身

春情懷故園

楊廷秀

竹邊臺榭水邊亭，不要人隨只獨行。  
乍暖柳條無氣力，半晴花影不分明。  
一番雨過來幽徑，無數飛禽有喜聲。

只欠翠紗紅映肉

謂海棠

兩年寒食負先生

詩話

平泉莊

李德裕東都平泉莊去洛城三十里，卉木臺榭若造仙府，有虛檻對引泉水，縈回疏鑿，像巫峽洞庭十二峯九



派迄于海門江山景物之狀以間行逕有平石以手磨之皆隱隱見雲霞龍鳳草樹之形初德裕營平泉遠方之人多以異物奉之有題平泉詩曰隴右諸侯供語鳥

日南太守送名花

劇談錄

### 吟治圃詩

馮長樂七歲吟治圃詩云已落地花方遣掃未經霜草

莫教鋤仁厚天性全生靈性命已兆於此

陳輔之詩話

雜著

以下係池

潭州東池戴氏堂記

柳宗元

弘農公刺潭三年因東泉為池環之九里邱陵林麓距其涯坻島諸洲交其中其岸之突而出者水縈之若玦焉池之勝於是為最公曰是非離世樂道者不宜有此卒授賓客之選者譙國戴氏曰簡為堂而居之堂成而勝益竒望之若連艦縈檻與波上下就之顛倒萬物遼廓眇忽樹之松栢杉櫨被之菱芡芙蕖鬱然而陰粲然而榮凡觀望浮游之美專於戴氏矣戴氏嘗以文行累

為連帥所賓禮貢之澤宮而志不願仕與人交取其退  
讓受諸侯之寵不以自大其離世歟好孔氏書旁及莊  
文莫不摠統以至虛為極得受益之道其樂道歟賢者  
之舉也必以類當弘農公之選而專茲地之勝豈易而  
得哉地雖勝得人焉而居之則山若增而高水若闢而  
廣堂不待飾而已矣戴氏以泉池為宅居以雲物為  
朋徒攄幽發粹日與之娛則行宜益高文宜益峻道宜  
益茂交相贊者也既碩其內又揚于時吾懼其離世之

志不果矣君子謂弘農公刺潭得其政為東池得其勝授之得其人豈非動而時中者歟於戴氏堂也見公之德不可以不記

南雍州池亭記

洪景盧

觀山者必於終南二華天台赤城觀水者必於五湖三江適梁魏周秦然後極通都大邑之盛不登凌風之臺黃雲之樓却月露寒之觀不足以游目騁懷竟瓌壯絕特之美彼夸者之談則然若是而充之馬必須蒲梢鬣

邾之駿飲必中山桑落之酒魚太官之羔炊共城之稻  
繪秋風之鱸槎頭之鱖鄭衛娥媼以為御孟公君卿以  
為客冬室暝夏室寒朝經而夕緯之中心縈繞如車汰  
輶萬寧有足理今吾環堵之宮把茅蓋頭開數椽之窻  
掃隙地五六尺植竹數十個田父過我傾濁醪老瓦盆  
中張兩脚如箕徑醉輒睡無人乎柴門之下獨昌翔其  
間由我者吾豈不大好夫是之謂隨寓而安則吾焉往  
而不為勝庾嶺之南七十里以雄名州當孔道往來之

門候人者日緣續不絕守居不寬綽又無高明爽塏之臨以舒厥心主諾者幸滿秩決去何用知委蛇退食之可樂聽事之東故有池延袤且十畝滿中白芙蕖千葉而實池心突然亭亡而址存不知幾年數豫章王稚川至頗有意復之得廢寺棄材西向作屋周以欄廓然四澈榜曰種玉亭直北隄貫中架梁以往又南向作屋羅羣山於雉堞之外榜曰挹翠亭池亭距黃堂不費步武脫關闌囂塵而山藪林壑之勝具天寶開稚川銳使為

之以為凌江上善第一妙境人人指嶺表為瘴邑距知  
所謂隨寓而安者顧乃不啻足耶稚川佳公子善屬文  
作郡有治理效上官賢之雄民不能淹使留更數月當  
去其未去也舉杯中之淥並欄長吟有信來儻以示我  
古詩

南池

杜甫

崢嶸巴閬間所向盡山谷安知有蒼池萬頃浸坤軸呀  
然閬城南枕帶巴江腹芰荷入異縣粳稻共比屋皇天

不無意美利戒止足高田失西成此物頗豐熟清源多  
衆魚遠岸富喬木獨歎楓香林春時好顏色南有漢主  
祠終朝走巫祝歌舞散雲衣荒哉舊風俗高皇亦明主  
魂魄猶正直不應空陂上縹緲親酒食淫祀自古昔非  
惟一川瀆干戈浩茫茫地僻傷極目平生江海興遭亂  
身局促駐馬問漁舟躊躇慰羈束

夏日集葆真池上分韻得靜字

陳去非



清池不受暑幽討起予病長安車轍遠有此荷萬柄是  
身惟可懶共寄無盡興魚遊水底涼鳥語林間靜談餘  
日亭午樹影一時正聊將兩鬢蓬起照千丈鏡微波喜  
搖人小立待其定梁王今何許世傳葆真池梁惠王故沼柳色幾衰  
盛人生行樂耳詩律已其賸邂逅一樽酒它年五君詠  
顏延年評竹林七賢以山王貴盛黜而不取重期踏月來夜半嘯烟艇

律詩

天池


杜甫

天池馬不到嵐壁鳥繞通百頃青雲杪層波白石中鬱  
紆騰秀氣蕭瑟浸寒空直對巫山出兼疑夏禹功魚龍  
開闢有菱茨古今同聞道奔雷黑初看浴日紅飄零神  
女雨斷續楚王風欲問支機石如臨獻寶宮九秋驚鴈  
序萬里狎漁翁更是無人處誅茅任薄躬

盆池

陳去非

三尺清池窻外開茨菰葉底戲魚回雨聲轉入浙江去  
雲影還從震澤來



古今事文類聚續集卷九

欽定四庫全書

子部

古今事文類聚續集卷十一

詳校官中書臣孫衡

侍讀臣孫球覆勘

總校官編修臣王燕緒

校對官編修臣盧遂

謄錄監生臣施華

欽定四庫全書

古今事文類聚續集卷十

宋 祝穆 撰

居處部

橋

羣書要語橋水梁也或曰梁石橋也石杠謂之倚釋名獨

木之橋曰權亦曰衍今謂之畧衍楚人謂橋為圮舟

梁謂浮橋

說文

烏鵲填河成橋

淮南子

橋有鴈齒六帖長橋卧

波未雲何龍

阿房賦

駕海維河浮鼃役鵲

柳渙銘

造舟為梁

見於詩而杠榱倚竹雜出於子史若橋之為名則始於

商而獨著於周書逮秦漢乃各冠以地或因水而稱

朱弁

橋記近世以來其功利之大且廣者多為浮屠氏所有蓋

佛以慈憫利物為心而橋梁又居八福田之一同上以堅

石固其岸以巨材壯其趾脉絡貫穿勢侔坤軸一木所

幹萬鈞為輕犬牙相函魚鱗密次踴若鰲戴鼉如嶽壓

蛟螭盤結若飛若動同上橋柱下橫木入沙中者謂之蹲

鷓鴣志雜

詩句人跡板橋霜

溫庭筠

市橋官柳細

杜

江橋春聚船

杜

垂橋躡綵虹

李

飛橋上架漢

韓

野店山橋送馬蹄

杜

古今事實

造舟為梁

文王親迎于渭造舟為梁毛注天子造舟方言云浮梁也

鼃鼃為梁



周穆王從荆東至九江以鼃鼃為梁而渡

紀年

乘輿濟人

子產以其乘輿濟人於溱洧孟子曰惠而不知為政

伏於橋下

見報仇門

初作河橋

秦昭王四十九年初作河橋

史

抱橋柱死

尾生與婦人期不來水至抱梁柱而死

抱朴子

鞭石作橋

秦始皇作石橋欲過海觀日出處有神人能驅山石下

海去不速神鞭之流血

齊地記

隋履圯下

見履門

題橋乘駟

司馬相如往京師過蜀郡升仙橋題其柱曰不乘駟馬  
車不復過此橋

匿橋犯蹕

文帝行出中渭橋有一人從橋下走出乘輦馬驚使騎捕之屬廷尉張釋之治問曰縣人來聞蹕匿橋下見車騎即走耳廷尉奏一人犯蹕當罰金

就橋為安

前漢薛廣德直言諫諍元帝祭宗廟出便門欲御樓船廣德免冠頓首曰宜從橋云上不說光祿大夫張猛曰乘船危就橋安聖主不乘危乃從橋

先據浮橋

公孫述大司馬田戎將兵下江南至南郡據浮橋於江水吳漢鋸絕橫橋大破之

橋七十所

趙充國治湟陝以西道橋七十所令可至鮮水左右以制西域信威千里如從枕席上過師

橋下有蛟

見蛟門

據水斷橋

蜀先主為曹公所追張飛拒後據水斷橋無敢涉者

橋穿陷馬

魏伐蜀鍾會先命牙門將許儀在前理道會後行而橋穿陷馬足於是斬儀

請建河橋

杜預以孟津渡險請建河橋於富平津衆論不可及橋成上從百官臨會舉杯勸預曰非君不立也

先作浮橋

鄧艾伐蜀先作浮橋

引兵據橋

慕容垂與劉牢之戰晉大敗車騎慕容德等引兵要牢之于五丈橋

刺史治橋

王易周四鎮皆有善政橋壞覆民租車周曰橋梁不脩刺史過也乃償民粟為治其橋

古今文集

雜著

石橋銘

張或文

粹

閼茂歲我御史大夫李公晟奉詔總禁戎三萬北定河  
朔冬十月師次趙郡南石橋者天下之雄勝乃揆厥跡  
度厥功皆合于自然包我造化僕散客也狀而銘曰  
洙水伊河諸州牙湊秋霖夏潦奔突延袤杼材藏制撲  
斲紛揉幹地泉開盤根玉甃虹舒電拖虎步雲構截險  
橫包垂流迴透塊軋匠造琳琅簇簞敞作洞門呀為石  
竇賒莫算盈一紀方就力將岸爭勢與空鬪吞齊跨趙

徹夜防晝月挂虛蟾星羅伏獸謂之鈐鍵撮我宇宙謂  
之關梁扼我戎寇郡國襟帶山河領袖經途者安逸軌  
者覆東南一尉西北一堠萬里書傳三邊檄奏郵亭控  
引事物殷富夕發蒯孺朝趨禁雷質含水碧文耀藻繡  
花影全芳苔痕半舊天啓大壯神功罕究勒銘巨橋敢  
告豪右

萬安渡石橋記

蔡君謨

泉州萬安渡石橋始造於皇祐五年四月庚寅以嘉祐



四年二月辛未訖功索址于淵醜水為四十七道梁空以行其長三千六百尺廣丈有五尺翼以扶欄如其長之數而兩之靡金錢一千四百萬求諸施者渡實支海舍舟而徒易危以安民莫不利職其事盧錫王寔許忠浮圖義波宗善等十有五人既成太守蒲陽蔡襄為之樂合燕飲而落之明年秋蒙召還京道繇是出因記所作勒于岸左

利涉橋記

葉正則

嘉定四年二月黃巖縣浮橋成林萬叔和為其知縣楊君言曰橋長千尺籍舟四十欄楯緯索隄其兩旁相圖狻猊訖三十旬斤鐵九千木石二萬五千夫工六萬餘縣東南車馬擔負而客之途皆達於橋西北樵採攜挈而民之市皆趨於橋諸公跨天台陟鴈蕩行過黃巖皆喜曰增一橋矣蓋奔渡爭舟傾覆蹴蹋之患既免而井屋之富廛肆烟火與橋相望不絕甚可壯也古無而今有難也橋於江之險又難也台州有橋自唐守始君一

縣作之抗其力如州倍難也願子記以為君酬余病未暇也叔和又曰橋以未成為難衆人所知爾以既成為難君所自知也今歲別一困以待異日之缺尚懼不足雖然縣籍壞七十年矣君聚田百萬畝算而步折之更二載始得經界之舊君之力雖無難而承其後者易矣易則思無窮而橋可恃以常存也願并著之余卧水心久往來皆村野人語不到門前不知君材乃若是鄭大夫非異人耶舉鄭國解落整肅大效小驗具於春秋至

捐一車則天下以為笑彼秦洧之易視今之難奚百倍  
趙耶豈古人於此則或有故歟世常言極今人所難不  
足以進古人所易而充古人所易不能為今人所難何  
哉叔和之論未余質也可無為書余少從叔和兄弟游  
每為余言縣直北山爽氣浮動花柳之麗雪月之勝無  
不在江北余間至程頭必徘徊瞻顧輒阻江而屢返矣  
今既施橋而叔和與邑人日曳杖娛嬉於北山潮生沙  
落隨江降升悠然如泳漢浴沂以詠歌令君之遺德而

余已老不復有四方之事徒慨想而不能從也因附見之亦以志余之不忘斯游爾

古詩

方橋

韓愈

非閣復非船可居兼可過君欲問方橋方橋如此作

英州何公橋

蘇子瞻

天壤之間水居其多人之往來如鷁在河順水而行雲駛鳥疾惟水之利千里咫尺亂流而涉過膝則止惟水

之害咫尺千里沔彼濫觴蛙跳鯨游溢而懷山神禹所  
憂豈無一木支此大壞舞于盤渦冰折雷解坐使此邦  
畫為兩州鷄犬相聞胡越莫救允毅何公甚勇于仁始  
作石梁其艱其勤將作復止更此百難公心如鐵匪石  
則堅公以身先民以悅使老壯負石如負其子疏為玉  
虹隱如金隄直欄橫檻百賈所棲我來與公同載而出  
驩呼闐道抱其馬足我歎而言視此滔滔未見剛者孰  
為此橋願公千歲與橋壽考持節復來以慰父老如朱

仲卿食于桐鄉我作銘詩子孫不忘

惠州東新橋

蘇子瞻

羣鯨貫鐵索背負橫空霓首搖翻雪江尾挿崩雲溪機  
牙任信縮漲落隨高低輓轡卷巨索青蛟挂長隄犇舟  
免狂觸脫筏防撞擠一橋何足云謹傳廣東西父老有  
不識喜笑爭攀躋魚龍亦驚逃雷電生馬蹄嗟此病涉  
久公私困留稽姦民食此險出沒如鳧鷖似賣失船壺  
如去登樓梯不知百年來幾人如沙泥豈知濤瀾上安

若堂與閨往來無晨夜醉病休扶攜使君領我言妙割  
無牛雞不云二子勞歎我捐腰犀我亦壽使君一言聽  
扶藜常當修未壞勿使後噬臍

西新橋

蘇子瞻

昔橋本千柱掛湖如斷霓浮梁陷積淖破版隨奔溪笑  
看遠岸沒坐覺孤城低聊因三農隙稍進百步隄炎洲  
無堅植潦水輕推擠千年誰在者鐵柱羅浮西獨有石  
鹽木白蟻不敢躋似開銅駝峰如鑿鐵馬蹄岌岌類鞭



石山川非會稽嗟我久閣筆不書紙尾驚蕭然無尺筆  
欲駕飛空梯百夫下一杙椽此百尺泥探囊賴故侯寶  
錢出金閨父老喜雲集簞壺無空攜三日飲不散殺盡  
西村雞似聞百歲前海近湖有犀那知陵谷變枯瀆生  
芰藜後來勿忘今冬涉水過臍

垂虹橋

王介甫

三江五湖口地與天不隔日月所蔽虧東西渺然白漫  
漫漫北斗浩浩浮南極誰投此虹蜺欲濟兩間阨中流

雜蜃氣欄楯相承翼初疑神所為滅沒在頃刻晨興坐  
其上傲兀至中仄獨憐造化功不謂因人力今君持酒  
漿談笑顧賓客頗誇九州物壯麗此無敵熒煌丹砂柱  
璀璨黃金壁中家不慮始助我皆豪殖喟予獨不可還  
當采民力

吳江長橋

王逢原

老匠鐵手風運斤一挾刃入千山髡明堂有柱不見用  
此為失地猶濟人西瀦巨澤江海通陽侯利溺驚濤風

當道誰能支地險更東安得與天通莫比垂天紳莫比  
跨地帶渴龍乾死枯無鱗絕海失舟踏鯨背秦帝東遊  
逐仙跡累重肉多飛不得三洲水隔不到山借得紫虹  
千萬尺平時塵土埋英雄吾亦棄劒來遊東欲觀水盡  
朝宗海安得身乘破浪風為約他年可歸處獨倚闌干  
不思去季鷹范蠡不足竒待我為名千古歸

律詩

竹橋

杜甫

伐竹為橋結構同  
褰裳不病往來通  
天寒白鶴歸華表  
日落青龍見水中  
顧我老非題柱客  
知君才是濟川功  
合歡却笑千年事  
驅石何時到海東

垂虹橋

鄭毅

三百闌干鎖畫橋  
行人波上踏瓊瑤  
插天蟠螭玉腰潤  
跨海鯨鯢金背高  
路直鑿開元氣白  
影寒壓破大江豪  
此中自是銀河接  
不必仙槎八月濤

洛陽橋

劉彥冲

跨海飛梁疊石成曉風千里渡瑤瓊雄如建業虎城峙  
勢若常山蛇陣橫脚底江濤時洶湧望中煙嶼晚分明  
往來利涉歌遺愛誰復題橋繼長卿

井

羣書要語井清也泉之清潔也

釋名

井一有水一無水為

濁汙

爾雅

改邑不改井注井以不變為德者也井泥不食

注久不漂治者也井甃無咎注可以脩井之壞井冽寒

泉食注水清也羸其瓶凶注幾至而覆

井卦

井門戶竈中

雷為五祭

禮記註

坎井之蛙

莊子

輓轡井上圓轉木也

說文

詩句雙桐生枯井

魏明帝

林間鑿井新里巷汲來頻及見

羸瓶者翻思抱瓮人

魏野

古甃冷蒼苔寒泉湛明月

李白

井漱寒齒

柳

有井朱夏時輓轡凍階祀

杜

絡緯秋啼金

井欄

李井底泉通竹下池

賈島

靜院時聞放輓轡

韓偓

古今事實

黃帝穿井

黃帝始穿井亦云伯益作井

世本

堯民鑿井

帝堯之時有老人擊壤於路曰吾日出而作日入而息  
鑿井而飲耕田而食帝何力於我哉通歷

舜穿井

瞽瞍使舜穿井瞽瞍與象共下石填井舜為匿孔旁出  
井得土羊

魯哀公穿井得土羊孔子曰此獷羊也土之恠韓詩外傳  
九井相通

襄邑縣南瀨鄉有老子廟廟中有九井能潔齋入祠者

水温清隨人意念汲一井餘井水皆動

劉義慶  
幽明錄

抱甕灌畦

見園門

桔槔汲井

衛有五丈夫負缶入井灌韭終日一區鄧析過下車教

曰為機重後輕前命曰桔槔終日溉百區五丈夫曰吾

師言有機智之巧必有機智之心吾不為也

莊子又  
說苑

刺山泉湧

見泉門



拜井泉出

耿恭居疏勒匈奴攻城絕其水源穿井十五丈無水恭  
曰聞貳師將軍拔刀刺山飛泉湧出今漢德神明豈有  
窮哉乃整衣服向井再拜請祈有頃泉出

鑿井太大

賈耽鎮滑臺城北鑿八角井以鎮黃河於是潛令人伺  
之果有老父至問曰誰人鑿此井曰賈君老父曰大妙  
手但近東近西近南近北耳耽聞之曰是井太大也

廣記

鑿井得銅

龐儉鑿井得銅因以致富

渴中讓飲

晉阮籍嘗羣行冒熱渴甚逆旅有井衆人競趨之籍獨  
逡巡在後須飲者畢乃進

蘇耽橘井

見神仙門

母墮井死

白居易拜左贊善俄有言居易母墮井死居易賦新井

篇言浮華無行出為州刺史

始為鑿井

柳宗元曰始州之人各以甕甑負江水莫克井飲

井銘序

視井生男

婦人妊身三月未滿者著僭衣冠平旦繞井三匝映水  
視影勿反顧必生男陳成者生十女其妻繞井三匝呪  
曰女為陰男為陽女多災男多祥繞井三日不及及期

果生一男

博物志

陸羽井

見茶門

蜀鹽井

見鹽門

古今文集

雜著

塞廢井文

杜牧

井廢輒不塞於古無所據今之州府廳事有井廢不塞  
居第在堂上有井廢亦不塞或匣而護之或橫木以土  
覆之至有歲久木朽陷人以至於死世俗終不塞之不

知出何典故而井不可塞井雖列在五祀在都邑中物之小者也若盤庚五遷其都若社稷宗廟尚毀其舊而獨井豈不塞耶古者井田九頃八家環而居之一夫食一頃中一頃樹蔬鑿井而八家共汲之所以藉濟民而重洩地氣以小喻大人身有瘡不醫即死木有瘡久不封即亦死地有千萬瘡於地何如哉古者八家共一井今家有一井或至大家至於四五井十倍多於古地氣漏泄則所產脆薄人生於地內今之人不若古之人渾

剛堅一寧不由地氣泄漏哉易曰改邑不改井蓋取象  
言安也非井不可塞也天下每州春秋二時天子許抽  
常所上賦錫宴刺史及州吏必廓其地為大字以張其  
事黃州當是地古井不塞故為文投之而實以土

### 龍井記

秦少游

龍井舊名龍泓距錢塘十里吳赤烏中方士葛洪嘗煉  
丹於此事見圖記其地當西湖之西浙江之北風篁嶺  
之上竇深山亂石中之泉也每歲旱禱雨於他有不獲

則禱於此其禱輒應故相傳以為有龍居之然泉者山之積氣所發也西湖深靚空濶納光景而涵烟霏菱芡荷花之所附麗龜魚蟲鳥之所依憑漫衍而不迫紆餘以成文陰晴之中各有奇態而不可以言盡也故岸湖之山多為所誘而不克以為泉浙江介於吳越之間一晝一夜潮頭自海而上者再疾擊而遠馳兕虎駭而風雨怒遇者摧當者壞乘高而望之使人毛髮盡立心悼而不禁故岸江之山多為所脅而不暇以為泉惟此地

蟠幽而據阻內無廩史之誘以散越其精外無豪悍之脅以虧疎其氣故嶺之左右大率多龍泉井其尤者也夫畜之深者發之遠其養也不苟則施也無窮龍井之德蓋有至於是則其為神物之託也亦奚疑哉元豐二年辯才法師元淨自天竺謝講事退休於此山之壽聖院去龍井一里凡山中之人有事於錢塘與遊客之將至壽聖者皆取道井旁法師乃即其處為亭又率其徒以浮屠法環而呪之庶幾有慰夫所謂龍者俄有大魚



自泉中躍出觀者異焉然後知井之有龍不謬而其名  
由此益大聞是歲余自淮南如越省親過錢塘訪法師  
於山中法師策杖送余於風篁之上指龍井曰此泉之  
德至矣美如西湖不能淫之使遷壯如淞江不能威之  
使屈受天地之中資陰陽之和以養其源推其緒餘以  
澤於萬物雖古有道之士又何以加於此盍為我記之  
余曰唯唯三年八月日高郵秦觀記

卓錫泉記

見泉門

古詩

浚井

蘇子瞻

古井沒荒萊不食誰為惻  
鉗罌下兩綆蛙蚓飛百尺腥  
風被泥滓空響聞點滴上除青青芹下洗鑿鑿石沾濡  
愧童僕盃酒暖寒粟白水漸泓渟青天落寒碧云何失  
舊機底處來新潔井在有無中無來亦無失

引水

杜甫

月峽瞿塘雲作頂亂石崢嶸俗無井雲安沽水僕奴悲

魚復移居心力省

白帝城西萬竹蟠  
接筒引水喉不乾  
人生留滯生理難  
斗水何直百憂寬

律詩

留題石經院

蘇子瞻

窈窕山分井泉流  
伏澗清欲知深幾  
許聽放轆轤聲

新井

源遠匠難尋  
加欄底更深  
汲新聞土氣  
鑿徹見天心  
滴

亂鉗初發痕移斲漸深雲雷如震用飛出便為霖

井泉

劉彥冲

石井水濺濺寒莎映碧鮮雨聲添溜急天影入波圓曉  
汲連山寺春耕潤野田杖藜三嚙罷毛髮更蕭然

龍泉寺石井

王介甫

山腰石有千年潤石眼全無一日乾天下蒼生望霖雨  
不知龍在此中蟠

詩話

井有丹砂

抱朴子曰臨沅縣有廖氏世老壽後子孫殘折他人居其故宅復累世壽乃知是宅所為不知何故疑井水赤乃掘井左右得古人埋丹砂十斛丹汁入井是以飲水而得壽東坡云井有丹砂水長赤

故宅有井

盛弘之荊州記湘州南寺之東賈誼有井水極深上飲下大狀似壺即誼所穿井誼宅今為陶侃廟又寰宇記

賈誼廟在長沙縣廟即誼宅中有井上圓下方韓退之  
井詩曰賈誼宅中今始見葛洪墓上昔曾窺杜甫云賈  
傅井依然又詩云浪動灌嬰井皆此意也

井謎

樂府解題井謎云二八三八飛泉仰流蓋二八三八為  
五八五八四十也四十為井字故錢昭度食梨詩二八  
飛泉繞齒寒

瀉坐于井

金陵記江南計吏止于傳舍間及將就路以馬殘草瀉於井中而謂已無再過之期不久復由此飲遂為昔時劉刺喉而死後人戒之曰千里井不瀉莖杜詩云畏人千里井注諺云千里井不及唾疑唾字無義當為莖謂為莖所哽也按玉臺新詠載曹植代劉勲妻王氏見出而為之詩曰人言去婦薄去婦情更重千里不唾井况乃昔所奉遠望未為遲踟躕不得共觀此意乃是嘗飲此井雖舍而去之亦不忍唾也此足以見古人忠厚其

理明甚

蘇氏演義

### 銀床事始

晉書樂志載淮南王詩云後園鑿井銀作床金瓶素綆

汲寒漿杜詩露井凍銀床事始見于此

潘子真詩話

又許彥

周言嘉祐河濱人網得一石刻詩曰雨滴空階曉無心  
換夕香并梧花落盡一半在銀床

### 庖竈

羣書要語庖食厨也

說文

庖人不治庖尸祝不越樽俎而



代之矣

通

聞其聲不忍食其肉是以君子遠庖厨也

梁惠

王竈竈創也創造食物也

釋名

孟夏之月其祀竈

月

竈者

老婦之祭盛於盆尊於瓶注老婦先炊器也祭竈以祭

先炊也

社記

竈必為屏心突高出屋四尺怕無失火失火

者斬

墨子

煬者避竈

莊子

竈五突分煙者衆也

除萬世一時也

李云

作竈法當辰巳間隙地取土先掘

去上五寸以水美酒一升合和泥之以癸亥日修之此

日安竈自如也作竈法廣四尺長五尺欲安兩釜長七

尺子孫富貴作竈餘泥不可泥井井餘土不可泥竈大  
凶勿以壬癸庚辛萬支九空血忌破危閉建寅日皆凶  
竈君神字子郭衣黃衣披髮從竈中出知其名呼之可  
得除凶惡賈氏不知其名見之死猪肝泥竈

竈土云伏龍肝令

婦孝竈君以壬子日死不可用此日治竈當以五月辰日猪  
頭祭竈令人治生萬倍用犬祭竈凶敗雞毛入竈中致非禍

大骨入竈出狂子正月己丑日白雞祠竈宜蠶五月己

丑卯祠竈吉四月丁巳日祠竈百倍

雜五行書

竈馬狀如促

織穴於竈側俗謂竈有馬足食之兆

西陽雜俎

在名山深壑

無人跡之處臨水上作神竈屋長四丈廣二丈起基四

尺又嘗先掘基下土令必無故陷窆冢瘞之處所也開

南戶西戶東戶三也立竈於屋中央口向西竈四邊令

去釜九寸也以磚及細土構立之亦勿令穿折神竈之

法畢矣

茅善仙傳

竈之神每月晦日輒上天言人罪狀大者

奪紀紀者三百日也小者奪算

抱朴子內篇春秋

竈陞即今之

竈門安柴處

朱語錄

詩句厨人語夜闌厨煙覺遠庖杜再期永日閒提挈移

中庖柳行身踐規矩甘辱取媚竈朱雲生卧龍石水入

鍊丹竈山桃源人已往千古遺井竈山

古今事實

### 食中有髮

文公之時宰人上炙而髮繞之文公召宰人而誚之宰人曰臣有死罪三援礪砥刀利猶干將肉斷而髮不絕臣之罪一也援錐貫臠而不見髮臣之罪二也奉炙鑪

炭肉盡赤紅炙熟而髮不焦臣之罪三也堂下得微有  
嫉臣者乎乃召其黨而誚之果然乃誅之

韓子

食中有蠅

梁昭明太子食中頻得蠅虫之類密置拌邊恐厨人獲  
罪不令人見

飾厨傳

漢宣帝詔曰吏或擅興繇役飾厨傳稱過使客越職踰  
法以取名譽譬猶踐薄冰以待白日豈不死哉

可使監厨

或問禰衡曰荀文若趙稚長云何曰文若可借面弔喪  
稚長可使監厨請客

同上

荀儀容貌故可弔喪趙腹大噉

肉故使監厨

典畧

啖行炙者

顧榮字彥先輟已炙啖行炙者曰豈有終日執之而不

知其味也耶

世說

耽書忘肉

隋王劼為散騎常侍篤好經史用心既專性頗恍惚每對食閉目凝思盤中之肉輒為僕從所噉劼弗之覺唯責肉少罰厨人厨人以情白劼伺而獲之

監厨搃人

隋李圓通少孤賤給事文帝家帝為隋公每賓至常令圓通監厨圓通性嚴整婢僕敬憚惟世子乳母恃寵輕之每有干請不許輒持去圓通大怒叱厨人搃之數十帝善之以為堪大任後位太府卿

饗人麇肉

王文正局量寬厚未嘗見其怒飲食有不精潔者但不食而已一日子弟愬于公曰庖肉為饗人所私食肉不飽乞治之公曰汝輩人料肉幾何曰一斤今但得半斤食其半為饗人所麇公曰盡一斤可得飽乎曰盡一斤固當飽曰此後人料一斤半可也其不發人過皆類此

孔突不黔

以下係竈

孔子無黔突墨子無暖席



媚竈獲罪

王孫賈問曰與其媚于奧寧媚于竈何謂也子曰不然  
獲罪於天無所禱也

倚竈讀書

仲尼讀書老聃倚竈觚而聽之曰是何書也曰春秋也

觚額也  
蘇子

減竈

孫子使齊軍入魏地為十萬竈明日為五萬竈又明日

為二萬竈龐涓行三日大喜曰我固知齊軍怯入吾地  
三日士卒亡者過半乃倍日并行逐之暮至馬陵齊伏  
兵萬弩俱發涓乃自刎

### 沉竈生蛙

智伯攻晉陽而水入城不沒者三版沉竈生蛙懸釜而

炊人馬相食

戰國策

### 帝親祠竈

武帝時李少君言上曰祠竈則致物致物而丹砂可化

為黃金黃金成以為飲食器則益壽益壽則仙者可見  
於是天子始親祠竈

曲突徙薪

初霍氏奢侈茂陵徐福言其泰盛三上書輒報罷後霍  
氏誅滅告者皆封人為徐生上書曰客有過主人者見  
其竈直突傍有積薪客曰子為曲突徙其薪不者且  
有火患主人不應俄其家失火鄰里共救之幸而得息  
於是殺牛置酒謝其鄰人灼爛者在於上行而不錄言

曲突者或謂主人曰鄉使聽客之言不費牛酒終亡火  
患今論功而請賓曲突徙薪亡恩澤焦頭爛額為上客  
耶主人悟而請之宣帝召福為郎

### 黃羊祀竈

後漢陰識光烈皇后前母兄也其先出自管仲宣帝時  
陰子方者嘗臘日晨炊竈神形見子方再拜受慶家有  
黃羊因以祀之日後暴富子方常言我子孫必將彊大  
至識三世遂繁昌

自親釜竈

周澤為滎池令儉約妻子自親釜竈

東觀漢記

增竈疑敵

虞詡為武都太守羌欲邀遮詡詡密令吏人作兩竈日增倍之日行三百里詡曰虜兵多吾兵少虜見吾竈日增必謂郡兵來迎衆行速必憚進追我孫臆見弱吾今

示彊

本傳

祭竈請比鄰

見鄰居門

雞入竈凶

卞伯玉作東陽郡竈正熾火有雞遙從口入良久乃於突而出毛羽不焦鳴啄如故玉尋病殞

風吹竈凶

季南少明風角女亦曉家術為卷縣民妻晨詣爨室卒有暴風婦便上堂從姑求歸辭其二親姑不許乃跪而泣曰家傳術疾風卒起先吹竈突及井此禍為女婦主爨者妾將亡之應因著其亡日

漢書

古今文集

雜著

祀竈解

陸龜蒙

竈壞煬者請新之既成又請擇吉日以祀告之曰竈在  
祀典聞之舊矣祭法曰王為羣姓立七祀其一曰竈達  
于庶人庶士立一祀或立戶或立竈飲食之事先自火  
化以來生民賴之祀之可也說者曰神居人之間伺察  
小過作譴告者又曰竈鬼以時錄人功過上白於天當

祀之以祈福祥此僅出漢武帝時方士之言耳行之惑也苟行君子之道以謹養老以慈撫幼寒同而飽均喪有哀祭有敬不忘禮以約已不忘樂以和心室暗不欺屋漏不愧雖歲不一祀竈其誣我乎苟為小人之道以反君子之行父子兄弟夫婦人執一爨以自餬口專利以飾詐崇奸而樹非雖一歲百祀竈其私我乎天至高竈至下帝至尊嚴鬼至幽仄果能欺而告之是不忠也聽而受之是不明也下不忠上不明又可以為天帝乎



竈銘

後漢李尤

燧人造火竈能以興五行接備陰陽相乘

竈屋銘

晉摯虞

大孝養志厥次養形事親以敬美過三牲

雜箴

魏王朗

家人有嚴君焉井竈之謂也俾冬作夏非竈孰能俾夏作冬非井孰言

古詩

祭竈詞

范至能

古傳臘月二十四竈君朝天欲言事雲車風馬小留連  
家有杯盤豐典祀猪頭爛熟雙魚鮮豆沙甘鬆粉餌圓  
男兒酌獻女兒避酹酒燒錢竈君喜婢子鬪爭君莫聞  
猫犬觸穢君莫嗔送君醉飽登天門杓長杓短勿復云  
乞取利市歸來分

廁

羣書要語廁也又圉也

說文

觀室者周於寢廟又適其

偃焉注偃謂屏廁也屏廁則以偃溲

庚桑篇

呂靜曰械威

窬褻器也械虎子也窬行清也孟康曰廁行清窬行中

受糞者也

萬石君傳注

俗命如廁為屋頭并州人鑿土為室

廁在所居之上故也

資暇錄

古今事實

如廁而卒

晉侯將食麥脹如廁陷而卒

如廁心動

豫讓事智伯甚見尊寵趙襄子滅智伯讓變姓名入宮  
塗廁欲刺襄子襄子如廁心動執問則豫讓襄子曰義  
士也釋之高祖如廁心動見柏人金日磾如廁心  
動擒莽何羅

卷置廁中

范雎事魏中大夫須賈須賈為魏昭王使於齊齊襄王  
聞雎辯口乃使人賜雎金千斤雎不敢受須賈知之大  
怒以為雎持魏國陰事告齊故得此饋既歸以告魏相

魏齊齊大怒使舍人笞擊折脅摺齒睢佯死即卷以簀置廁中賓客飲者醉更溺睢故僂辱以懲後令無妄言者范睢得出伏匿更名姓曰張祿入秦說昭王拜以為相

廁鼠不潔

李斯為小吏見廁鼠食不潔近人犬數驚入倉觀倉中鼠食粟不見人之憂歎曰人之賢不肖如鼠矣在所自處耳乃從荀卿子

如廁而遯

高祖與項羽會于鴻門因如廁召樊噲等四人間道走軍

踞廁而見

漢武帝時大將軍青侍中上踞廁視之

如廁有野燕

郅都侍上賈姬如廁有野燕入廁中上目都擊之都不往  
上欲自往都伏諫曰一姬死復一姬生上欲自輕柰

太后宗廟何太后聞之賜都金焉

潘湑著筆硯

左思著三都賦潘湑皆著筆硯

謫守廁

淮南王安謁仙伯坐起不恭主者奏安不敬謫守廁三

年

神仙記

露頭入廁

張碩曰不宜露頭入廁夜行必以燭

曹植社蘭戒香

如廁見朱衣

陶侃嘗如廁見一朱衣赤幘劒履曰以君長者故來報君後當為公侯至八州都督

廁婢列侍

石崇以奢豪矜物廁上常有十餘婢侍列皆有容色置甲煎粉沈香汁如廁者皆易新衣客皆羞脫而王敦脫故著新意無怍諸婢相謂曰此客必能作賊又嘗荒恣於色體為之敝左右諫之敦曰甚易耳乃開後閣驅諸



婢妾十餘人並放之

廁婢持香

晉劉寔少貧窶及後位太尉每崇儉素嘗詣石崇家如廁見有紋帳裯褥甚麗兩婢持香囊寔便退笑謂崇曰誤入卿內崇曰是廁耳寔曰貧士未嘗得此更如他廁

戒廁上相尋

郭璞素與桓彝友善每造之或值璞在廁間便入璞曰卿來他處自可徑前但不可廁上相尋耳必客主有殃

彛後因醉詣璞正逢在廁掩而觀之見璞裸身被髮銜  
刀設醊璞見彛撫心大驚曰吾每囑卿勿來反更如是  
非但禍吾卿亦不免矣璞終受王敦之禍彛亦死蘇峻  
之難

食棗飲澡豆

王敦初尚主如廁見漆箱盛乾棗本以塞鼻王謂是菓  
食盡婢擎金盤盛水琉璃盛澡豆因倒著水中而飲之

羣婢掩口

世說

廁置香爐

劉季和性好香上廁置香爐主簿張坦曰人名公作俗人真不虛也季和曰荀令君至人家坐處三日香君惡

我愛好也

襄陽記

如廁見方相

庾翼鎮州如廁見一物頭如方相兩眼大有光翼擊之入地因病而薨

夢鹵簿入廁

宋沈慶之在文帝時夢引鹵簿入廁中意惡之占者曰  
君必大富貴然不在旦夕間鹵簿固是富貴容廁中所  
謂後帝也知君富貴不在今主慶之果以孝武世登三  
事

焚經投廁

後魏崔浩好非毀佛法而妻郭氏敬好釋典時時讀誦  
浩怒取而焚之捐灰廁中及浩得罪被置檻內送城南  
衛士搜其上呼聲教聞於行路自宰司之被戮未有

如浩者人以為報應

廁神月巡

侍御史錢義方居常樂第夜如廁忽見蓬頭青衣數人來逼義方曰汝非郭登曰然余乃廁神每月出巡

續幽  
怪錄

燭淚成堆

寇準知鄧州自少年富貴不點燈尤好夜宴劇雖寢室亦燃燭達旦每罷官去後人至官舍見廁溷間燭淚在

地徃徃成堆

歸田  
錄

如廁遇鬼

有承郎馬上內逼急詣一空宅徑登溷軒乃大優穆刀  
綾空屋也將上馬穆優忽至曰侍郎他日內逼請光訪

北夢  
瑣言

古今文集

雜著

李赤傳

柳宗元

李赤江湖浪人也嘗曰吾善為歌詩詩類李白故自號

曰李赤遊宣州州人館之其友與俱遊者有姻焉問累日乃從之館赤方與婦人言其友戲之赤曰是媒我也吾將娶乎是友大駭曰足下妻固無恙太夫人在堂安得有是豈狂易病惑耶取絳雪餌之赤不肯有問婦人至至與赤言即取巾經其脰赤兩手助之舌盡出其友號而救之婦人解其中走去赤怒汝無道吾將從吾妻汝何為者赤乃就牖間為書如卵圓封之又為書塼封之訖如廁久

集有而字

其友從之見赤軒廁抱甕詭笑而側

視勢且下乃倒曳得之又大怒曰吾已升堂面吾妻妻之容世固無有堂之飾宏大廣麗椒蘭之氣油然而起顧視汝之世猶溷廁也而吾妻之居與帝居鈞天清都無以異若何苦余至此哉然後其友知赤之所遭乃廁鬼也聚僕謀曰且去是廁遂行宿三十里夜赤又如廁久從之且復入矣為友洗其汙衆環之以至旦去抵他縣縣之吏方宴赤拜揖跪起無異者酒行友未及言已飲而顧赤則已去矣走從之赤入廁舉其木捍門門



堅不可入其友呌且言之衆發牆以入赤之面陷不潔者半矣又出洗之縣之吏更召巫師善呪術者守赤赤自若也夜半守者怠皆睡及覺更呼而求之見其足於厠外赤死久矣獨得尸歸其家取其所為書讀之蓋與其母妻訣其言辭猶人也柳先生曰李赤之傳不誣矣是其病心而為是耶抑固有厠鬼耶赤之名聞江湖間其始為士無以異於人也一惑於恠而所為若是乃反以世為溷溷為帝居清都其屬意明白今世皆知笑赤

之惑也及至是非取與向背決不為赤者幾何人耶反脩而身無以欲利好惡遷其神而不返則幸耳又何暇赤之笑哉

登溷詩

任師孟知洪州作靜堂自愛之無日不到作詩曰每日更忙須一到夜深長是點燈來李元規笑曰此乃登溷

詩也

倦游錄

登溷處

柳永詞云今宵酒醒何處楊柳岸曉風殘月或以為佳  
句東坡笑曰此稍工登溷處耳

志林

古今事文類聚續集卷十